

339

no. 3

LETTRE
DE MONSIEUR
LE MARQUIS
DE LA VIEUVILLE.

A MONSIEUR
LE CHANCELIER.

7 4 2

1850
24 1 17 17 17 17
17 17 17 17 17 17
17 17 17 17 17 17

17 17 17 17 17 17
17 17 17 17 17 17

*LETTRE DE MONSIEUR
LE MARQUIS DE LAVIEUVILLE
A MONSIEUR LE CHANCELIER.*

MONSEIGNEUR,
 Je souffre tant de violence, & suis réduit à telle
 extrémité, qu'il n'est plus en moy de contenir mes cris, on
 m'arrache l'honneur, on cherche ma vie, & m'ôte on le
 bien, ie n'ay rien à craindre de pis, ie me sens innocent, ie
 sçay mes services, & cognoist la bonté du Roy, ce rencon-
 tre n'est point explicable; Ce que Dieu mesme nous per-
 met & la nature nous enseigne, sôt crimes pour moy seul,
 ou sommes nous? ceux qui ne m'ont point veu me plain-
 gnent, & l'on presse vn bon maistre de m'abandonner, la
 commiseration publique leue la bonde à ses plainctes sur
 mon sujet, & l'on charme le meilleur Roy du monde in-
 ques à rejeter vne femme éplorée à ses pieds, criante pour
 vn mary, son sujet accablé d'ennemis pour son service, &
 ie me tairois, à Dieu ne plaie, mon affection n'est point
 amoindrie pour luy, i'ay le mesme courage qui a fait por-
 ter si hardiment à ma langue, & à ma main, mes services en
 public, pour soustenir d'vn mesme front l'interest du Roy
 dans mon oppression, les rigueurs que i'ay resenties dans
 sa bonté, & les violences d'aujourd'huy dans sa Iustice na-
 turelle; Je ne m'aduouïeray point coupable sous vn res-
 pect imaginaire, faute de distinguer, ie ne le suis (à la mode
 de mes ennemis) que d'vne tres-parfaite fidelité, & d'vne
 affection qui n'a pas esté inutile, ny mercenaire, ny mal-
 heureuse. Je voy fort bien les vrais bras d'où me viennent
 ces foudres, sans m'adresser brutallement aux empruntez,
 & neantmoins comme ie combats encore avec esperance,
 le nom m'en demeurât sur les lèvres, ie les appelleray seu-
 lement malheur; La calomnie du temps est si raffinée, qu'il

estoit difficile au Roy de la recognoistre, à son premier abord, les plus grands Monarques n'ont pas peu quelques-fois s'exempter de surprise, ny les plus Saints des artifices des meschans; Plus ou moins de circonstances ne font rien, le Roy n'en sera pas moins Saint ny glorieux à la posterité, tout gist à ouvrir ce rideau que ses ennemis (& les miens) luy tiennent tiré devant les yeux, & le renforcent tous les iours de nouveaux pretextes: Aussi voyez vous que leur secret au commencement a esté le cachot pour m'empescher de parler, comme aujourd'huy il va à me bannir, sous des crimes supposez, esloigner mes amis, intimider les autres, & ainsi m'enfermer aussi estroittement qu'ils auoient fait, entre des murailles & des grilles, en des extremités autant malicieuses qu'invincibles. Iugez (MONSEIGNEUR) de celle-cy; si ie sort hors du Royaume, on me fait criminel; & si i'y demeure, ie n'y ay point de seureté; quel milieu me donne-on, en est-ce vn de m'aller offrir au sanglant sacrifice de la rage de mes ennemis, ou à des ignaues soumissions pour me faire obtenir honteusement de la cire verte, & perpetuer dans vn si beau titre la memoire de mon infamie à mes enfans; Rien moins que tout cela. Dieu est iuste & nostre Roy trop bon. Et vous (MONSEIGNEUR) qui tenez heureusement pour cet Estat le dépost Souuerain de la Iustice, trop sage & genereux pour souffrir la dernière extremité de ceste violence. La France s'éjoüist en ses loix, en ses saintes franchises, & en ses iustes priuileges, vous ne la souffrirez pas contrister, ny flestrir ses beaux lys pour moy seul. Elle à des Parlements (si ie ne merite plus aucune grace) qui sont les vrayes colonnes de la Iustice, & entretiens ceste sainte & tres-auguste Cour des Pairs, qui depuis tant de Siecles éclaire, non seulement la France, mais (s'il faut dire) tout le monde de son éclatante doctrine, & admirable integrité. C'est là (MONSEIGNEUR) c'est là où se renuoyent les criminels de leze-Majesté, comme l'impiété me suppose, c'est là où l'on doit voir vn principal Ministre de ce grand Estat sur la Selette, s'il est tant cri-

minet, & non à des Juges faits exprés : l'en reuere la compagnie, mais ie n'en dis pas autant de tous les membres. Ce n'eust pas esté vn petit seruice au Roy de faire voir cét homme qui s'est picqué d'vne exquisite probité, conuaincu hautement de vollerie, ou d'infidelité, comme il n'est pas d'vne petite consequence de bander maintenant l'autorité d'vn grand Roy contre vn ver de terre, mais qui l'a tres-fidellement & tres-heureusement seruy ; Il m'est bien dur d'auoir le Roy en teste, contre lequel ie n'ay point d'autres armes que les cris, les tres-humbles prieres, les soubmissions, l'obeissance, & vn amour inuiolable. Qu'ay-je fait à mes ennemis pour m'estre si cruels ? & si au premier bruiet de ma liberté le Roy s'en est éjouy ? pourquoy tant d'artifices pour luy aigrir l'esprit ; Ils appuyent leurs nouvelles calomnies d'vne ombre de iustice, pour me mieux assommer à la sourdine, & me perdre irreconciliablement auprès du meilleur Maistre, & du plus Iuste Roy qui fut iamais ; mes Lettres se rejettent comme pestiferées, il est deffendu de parler de moy, & ma Femme (à qui la nature mesme donne ce priuilege) est rebutée cōme vne incognüe : on n'observe plus de formalitez, me voila dans la bouche des trompettes pour appeller celuy qu'ils voudroient sçauoir au centre de la terre, (& ne voyent pas que mes seruices trompent bien plus haut ma fidelité dans la France, & que l'Europe mesme la cognoist ?) Quia il plus, sinon m'exposer en peinture à la derision publique, & voir donner à mes enfans vn bissac sur l'espaule, pour la recompense de cent ans de seruice domestique de leur pere dans la maison du Roy auprès de ses ancestres, & du mien auprès de sa Sacrée Personne, depuis son aduenement à la Couronne. N'a-on pas veu leurs chemises saisies, & iusques aux moindres drapeaux de ceux du berceau, lors de leur premiere fureur apres ma disgrace, c'estoient les six cents mil escus que cét effronté denonciateur crioit si haut que i'auois emporté, (il debuoit dire en mes poches) & que i'auois caché finement dans le coffre de leur linge ; il a fallu des Arrests &

des Commissaires pour le retirer, & d'une telle source quel moindre torrent de violence s'en peut-il imaginer. Bon Dieu (MONSEIGNEUR) quel remede à vn tel malheur, quel miserable petit trou me donne-on pour m'eschapper, ny a-il plus de grace ny d'humanité, quelle gloire, ou quelle utilité de me porter par desespoir à telles plainctes, si ce n'est que Dieu le veuille ainsi, pour faire voir au Roy des veritez, qu'autrement il ne cognoistroit (peut-estre) de long-temps; Il verra que les innocēs sont opprimez sans se pouoir iustifier, que la Veufue & l'Orphelin (comme ma femme & mes enfans le sont en ma personne) demeurent accablez sans protection, que c'est oster la seureté, & peut-estre esbranler l'affection des plus gens de bien, & de ses plus affidez seruiteurs en mon exemple, & qu'après s'estredit, & témoigné, le singulier protecteur de ceste sainte Themis, que nostre France a tous-jours reuerée dans ce sacré Senat; Il luy oste sa legitime autorité pour la donner à vne estrangere, & comme si mesme il ne luy peut confier les crimes qu'un homme de neant doit scauoir pour s'en rendre le denonciateur contre moy. En voicy huit que i'ay appris de son impudente vanterie. L'euation de ma prison. Que i'ay fait payer les Suisses au temps de la necessité dans les affaires du Roy. Que i'ay fait donner de l'argent au Tresorier de l'Espagne Beau-marchais par preference. Que i'ay parlé au Comte Mansfeld, & traicté avec luy sans la permission du Roy. Que i'ay pareillement traicté avec les Ambassadeurs sans congé. Que i'ay changé les resolutions du Conseil. Que i'ay cherché d'aigrir le Roy contre ceux en qui il doit auoir toute confiance. Et pour dernier Galimatias, que i'ay reuelé les secrets du Roy. I'y responds. Mais auant (MONSEIGNEUR) permettez-moy, s'il vous plaist de gémir, en considerant la qualité de ce miserable, & me pardonnez, si l'affection avec laquelle ie vous ay tous-jours cherement honoré, me fait dire plus pour vous que pour moy, car n'estant plus qu'un malheureux, c'est peu; ou c'est beaucoup pour vous, que tant de rares vertus

& de merites, ont esleué à ce haut degré d'honneur, où vous
 estes, & qui tenez encor le principal timon des affaires, &
 des Conseils du Roy, si vous souffrez que l'Histoire fasse
 voir aux Siecles à venir, que de vostre temps vn incognu de
 la lie du peuple, se soit rendu denonciateur contre vn qui a
 eu l'honneur d'estre vostre Collegue dans les affaires, &
 que sous ombre de decouvrir mes pechez plus cachez (si
 i'en auois) il choque vn homme de la condition où il auoit
 pleü au Roy de m'esleuer, & luy arrache impunément
 l'honneur, la vie, & le bien : si vous y jettez tant soit peu les
 yeux vous verrez que personne n'est exempt d'en parler par
 esprouue, aussi chacün espere-il que si vous ployez sagement,
 & écoutez iustement, c'est pour mieux informer apres le
 Roy de la verité, & ramener plus hardiment ma cause au
 grand chemin de la Iustice, ou plus sensiblement à la dou-
 ceur. Je dis donc à ce premier crime; Que ie n'ay pas creu
 qu'on peust punir de crime capital ce que Dieu n'a point
 fait peché, & qui est naturel, comme la liberté. Que c'est
 apres treize mois de prison, pendant lesquels on ne m'a pas
 dit vn mot, ny ne m'a-on permis de vous demander Iusti-
 ce, que l'extrême rigueur sans adoucissement m'a desespe-
 ré, ayant esté six mois auparauant que d'obtenir la grace
 d'enuoyer vne seule ligne de ma main à ma femme, & d'en
 receuoir autant de la sienne, pour seulement nous entr'as-
 seurer de nos vies. Y auoit-il vn secret d'Estat apres les pre-
 cautions que i'offrois d'escrire, si peu, & en tels termes que
 l'on m'eust prescrit, & depuis qu'il me fut permis, ie n'ay
 eu de six lettres pas vne respōce, les voleurs (me disoit-on)
 déualisoient mes messagers sur les chemins. Quelle défaite
 (MONSIEUR) iugez-en, & comment, ne pas croire qu'on
 ne me fist des-jà mort auprès du Roy, n'apprenāt rien que
 de pareilles chimeres sur tout ce que i'ay iamais demandé.
 que ne scachant pourquoy i'estois prisonnier, & me resou-
 uenant que le Roy de son extrême bonté auoit combattu
 fortement mon éloignement, avec toutes les tendresses
 d'un tres bon Maistre, que pas vne de mes lettres

8
estoyent monstrées, & que mesmes il luy échappoit quel-
ques fois de témoigner que ie l'auois bien seruy : i'ay creu
ne luy pas déplaire de rechercher les moyens de ma liber-
té, comme il l'eust veu, ainsi que i'ay cy. deuant dit, & finalle-
ment ie ne trouuois point de difference entre vne prison
forcée, & vne volontaire par obeissance, laquelle i'offrois
par mes lettres, & offre encore d'aller garder exactement
chez moy, avec ma famille, si il plaist au Roy me l'ordonner.
Au second, ie vous en prends à témoin (MONSIEUR) &
Monsieur d'Herbaut, qui à la Suisse en son département,
combien de dépêches il en a fait par le commandement
du Roy, & combien il m'en a pressé, & quelles difficultez
Monsieur le Marquis de Cœuvre a fait de s'en aller, qu'il
ne sceut la voiture de l'argent estre partie, & presque arri-
uée à Soleurre, & comme mesmes dans la somme qui fut
resoluë, celle des gaiges des Officiers y estant comprise, on
me l'a fit remplacer d'un nouveau fonds : I'en dirois bien
d'autres particularitez encore plus pressantes (si bien que
c'est vn affaire public) ie ne voyois mes ennemis s'écrier
que ie reuelle les secrets du Roy, il reste qu'en la distribu-
tion i'y aye eu quelque part, & comment, si ie ne l'ay ia-
mais veüe ny sceüe : vous sçauiez comme moy que l'ordre
en a esté enuoyé à Messieurs la Marquis de Cœuvre & Mi-
ron, de la faire sur les lieux, ils peuuent témoigner avec tous
les Officiers si la voiture ordonnée n'a pas esté entiere : Je
pense que cela suffit, & puis on ne me parle que indefini-
ment. D'alleguer la necessité du Roy pour aggrauer ma
faute, cela est du tout intollerable ; car ie pourrois respon-
dre en ce seul mot, que i'ay laissé le Roy plus riche de dix
millions d'or qu'il n'est pas maintenant, ie n'en blâme pas
la despence, & la veux croire iuste & necessaire, puis qu'elle
est sous l'autorité du maistre ; Mais pour en rendre vn
meilleur compte, i'escris hardiment aussi bien que ie l'ay
dit en prison à quelqu'un, que i'ay laissé quatre cents mil
escus contans à l'Espagne, toutes les despences ordinaires
requises pour toute l'année (ainsi estois-je en arriere) &

telle des garnisons, & autres gés de guerre à bien peu près, & plus de huit cents mil escus prests à recevoir, i'auois dix millions de liures d'autre fonds en deux moyens, le plus grand desquels estoit resolu, verifié, & Partisans assurez par bon traité d'en faire les paiements: Je ne dis rien d'autres dix millions de liures & plus que ie reseruois, avec vn certain grand fonds annuel, pour acheuer le plus glorieux traité que ny la France ny Monarchie à nous cogneue aye iamais entrepris; Le rachapt pour quatre-vingts millions du domaine en seize années, le Roy le scait, ie l'auois rapporté dans son Conseil en sa presence, & l'auoit approuué avec plus d'honneur pour moy, que ie ne meriteray iamais: Apres ce temps qui rencontroit l'âge du Roy dans sa plus forte vigueur, son reuenü se trouuant augmenté de plus de trois millions d'or, pouuoit seruir ou de ressource aux engagements que la guerre force quelque-fois de faire, ou de supplément, & au delà pour satisfaire lors abondamment, & aux despences ordinaires, & aux liberalitez du Roy, & à l'entretienement d'une armée de cinquante mille hommes & plus, si luy eust plu de la mettre sus pied, sinon à décharger son peuple d'autant: Je ne compte non plus le fonds de la composition des Officiers de Finances, desquels, sans violence, sans mescontentement, & sans condamner l'innocent avec le coupable, ny les plus coupables impunis, i'eusse tiré beaucoup plus qu'on a fait, & quand ie dirois quatre millions d'or ie ne me mesconterois pas, moyennant quelques accommodations, c'eust esté sans faire de si grands frais, & si ie remediois aux mesmes desordres, & aux plus subriles griuelées par l'ordre que i'auois estably, & lequel ie gardois inflexiblement. Apres cela peut-on crier necessité: Mais i'entends (MONSIEUR) le Mercure François, dans lequel vous auez permis que ie fois déchiré comme vn scelerat, qui trāscrit vni-quemēt pour moy les passions effrenées de mes ennemis: Il me preuient d'une responce; Que recevoir beaucoup, peu dépendre, & rogner à tout le monde, est vn moyen

fort triuial pour amasser vn grád fonds; Ce seroit l'aduouer
 en moy fil sen alloit sans repartie, il ne veut pas veoir que
 i'ay rrouué le Roy plain de debtes, & de despences à acqui-
 ter, où les guerres passées l'auoient porté; Que i'ay rencon-
 tré bien peu de fonds en la premiere année de ma charge, &
 que fil sy est vendu du bien du Roy pour y satisfaire, il fest
 aussi-tost remplacé, & au delà: Il compte pour rien quinze
 cents mil liures de rente, dont le reuenu du Roy fest aug-
 menté de mon temps, cela estoit bon pour vn autre milion
 d'or d'augmentation que i'auois rapporté au Roy, faict re-
 foudre & allois establir, ou bien pour les autres gráds mo-
 yens, doux, infaillibles, & presens, pour le soulagement du
 peuple, avec augmentation pourtant de reuenu, où le Roy
 rémoignoit tant desentiment, & dont ie vous ay plusieurs
 fois entre tenu, car il ne le sçauoit pas: Mais ie puis dire qu'il
 ne se veut pas souuenir qu'en ceste mesme année i'ay autát
 acquitté, (ie dis argent comptant pour les gens de guerre)
 qu'en telle des années de nos plus grands mouuements, ny
 ayant pas moins de treize milions de liures, aussi peu veut-
 il sçauoir que i'ay plus acquitté de dons, & de pensions,
 qu'il ne sen trouuera du temps du feu Roy: Ie luy donne à
 choisir l'année en tout son regne. Voila comme i'ay pratti-
 qué la belle maxime: Il auroit bien mieux fait de ne pas dé-
 crire les affaires du Roy, en pensant blasmer ma conduite,
 & en fidel Historien rendre la gloire à son Prince, qu'un
 estranger (sans passion) luy auroit donnée, fil auoit écript
 sur ce subject. On y verroit comme sous son autorité, &
 par ses ordres i'ay ménagé dès ceste premiere année le fods
 des aduances ordinaires & extraordinaires pour l'année
 sui uante, & ainsi espargné d'abord plus de quatre cents mil
 liures d'interests, qu'il auoit accoustumé de payer tous les
 ans: Il n'y tairoit pas cent cinquante piécés d'artillerie qui
 se sont faites & refonduës dans ses Arcenaux, qu'on n'a-
 cheptoit les affusts qu'à centaines, les balles à centaines de
 milliers, & la poudre qu'à millions de liures: Il n'auroit pas
 eu le don d'oubliance de sa preuoyance vrayement royal-

le pour les fortifications de la principale frontiere en toutes ses places, & toutes à la fois, ny de ses soings (outre ces despences necessaires) pour les ouurages publics, son bastiment du Louure, l'Isle deuant Nostre-Dame, le paracheuement du pied d'estail sur le Pont-neuf, la resolution d'un nouveau Pont au Change, le nettoiyement des fossez de Paris, la perfection de la grand' Salle du Palais, l'entrée des Fontaines de Rongis dans la Ville, & tant d'autres que ie m'abstiens de rapporter, que son esprit tous-jours agissant designoit tous les iours pour sa bonne Ville de Paris, & finalement comme outre tout cela il m'auoit commandé (& voicy l'un de ses bons secrets) de luy reseruer vn million d'or à la fin de l'année derniere pour le mettre à la Bastille, ie l'eusse fait, & ie dis plus que dans l'année presente (i'entends avec la paix) le Roy n'eust pas eu moins de deux millions d'or deuant luy, & qu'ainsi avec le premier quartier de son reuenu (car ie ne dis plus rien des aduances) à la fin duquel les leuées ordinairement se font pour la guerre, s'il y en doit auoir; Il se trouuoit si puissant, que reculant seulement sans rien emprunter ses autres despences, le quartier suiuant il eust peu entretenir l'armée que i'ay desjà dit six mois durant. Ce n'est point des songes que l'enuey d'une longue prison m'aye fait resuer, le Roy l'a sçeu, & commandé, vous l'avez sçeu & approuué, & ceux du mestier m'en voyoient si proche, qu'ils festimoient heureux d'y prendre chacun autant de part dans le merite, que plus ou moins ils y pouuoient contribuër: l'ay honte, (MONSEIGNEVR) que pour me deffendre dans l'honneur du Roy contre deux incognus, l'un de nom, l'autre de qualité, de si atroces calomnies, ie sois contrainct de rapporter icy de mes seruices, vous les sçaez, & beaucoup d'autres, que vous n'avez pas iugez petits, ie n'y pretends autre merite qu'en l'exécution, celuy de vostre diligence & de vos sages conseils y demeure entier, comme le principal, & la premiere gloire en est iustement acquise au commandement du Roy. Mais reuenant à moy, ce m'est bien vn plus.

grand creue-cœur que tant d'affection, au-moins que i'ay
témoignée (si ie ne doibs dire mes seruices) soient aujour-
d'huy si peu confiderez, & fassent vn si petit contre-poids,
que ie me voye traité de peste publique, & poursuiuy à
telle outrance, que ie ne sçache ou donner de la teste pour
sauuer ma vie. Au troisieme il faut distinguer l'accusation
qui est captieuse, si c'est de son année 1620. ou de l'année
1623. que ie luy ay fait tomber du fonds entre les mains
par preference, si le premier, ie le nie absolument, & me
condamne, s'il se trouue que i'en aye signé vne seule or-
donnance: Et comment l'aurois-je fait, que ie n'en auois
pas le pouuoir, ma charge a commencé en 1623. & par ce
que lors les cōptes de l'Espargne de 1620. 21. & 22. estoient
encore à clorre, le Roy choisit des Commissaires pour les
ouyr & arrester, & en fit expedier trois commissions sepa-
rées: Si ie suis compris en celle de 1620. si i'ay esté à l'exa-
men de ce compte-la, si ie l'ay veu seulement, i'ay tort,
pourquoy donc m'en jeter le chat aux jambes, ceux qui
l'ont clos & signé sont encore viuants & dans les affaires,
ils en rendront bonne raison: Que si par leur arresté i'en-
tends l'Estat au vray, ils y ont passé en recepte les fonds
qui luy auoient esté des-jà destinez, & dont peut estre il
a peu faire le recouurement de mon temps, qu'en puis-je
mais, le principal n'est il pas en la despence, il ne s'en est
pas fait moins pour l'Espargne de 1621. de laquelle i'ay re-
tiré du fonds qui luy restoit, toute la despence acquittée:
Qui auroit pris creance en moy dans la necessité, si de
mauuaise foy i'auois arraché aux trois Tresoriers de l'Es-
pargne le fonds qu'ils auoient pour leur remboursemēt,
qui l'a fait auparauant moy! & qui voudroit estre com-
ptable à ce prix, n'y obeyr à ses ordonnateurs: Si ie l'ay fait
en quelque façon pour 1622. ç'a esté premierement com-
me Commissaire, & non comme Sur-intendant, & puis ie
rouchois encore à ceste année-là, & pouuoit-on retran-
cher beaucoup de pretentions à acquitter, comme il s'est
fait apres que le Roy luy-mesme de sa main a rayé dans

ses Estats ce qui luy à pleu : Mais des despences qui nous ont paru acquittées, ie n'ay point veu proposer qu'il les faulst rayer, & n'ay pas eu moins de soing apres de laisser du fonds au Tresorier de laditte année, que pour celle où ie seruois. Reste donc l'année 1623. en laquelle ce n'est pas merueille d'auoir fait venir du fonds par preference, mais c'en est bien vne toute entiere, d'ouyr mes ennemis croasser là dessus: Voyons l'inconuenient; Toute la despence de l'Espargne est ordinaire ou extraordinaire, la premiere a esté arrestée par le Roy mesme, dès les premiers iours de ma charge, & n'y estois pas seul, & si ce n'a pas esté en augmentant. Reste donc l'extraordinaire, qui n'est couchée dedans l'Estat general que par estimation: A cela ie respōs, que si i'auois eu l'esprit de griuelée, pourquoy aurois- ie inuenté vne precaution qui ne fut iamais auparauant moy pour m'en conuaincre apres (comme l'on dit) sur l'etiquette du sac, & sās replique. La voicy: Faire voir toutes les ordonnances desdittes despences au Roy, auant que de les faire acquitter, & puis en dresser des Estats distinguez par chapitres, selon la nature des despences, & ce pour chacun mois, & en faire trois coppies, où le Roy prenoit la peine luy mesme de parcourir, tantost en l'vne, tantost en l'autre, confrontoit les mesmes sommes en plusieurs parties, & tous-jours la totale (son excellente memoire m'y à remarqué souuent le subject du moindre voyage, dont il auoit desja veu l'ordonnance) & puis apres toutes ses diligences il choisissoit l'vne de ces coppies, qu'il signoit pour ma décharge, & puis vn autre qu'il me faisoit signer deuant luy, & aussi-tost la mettoit dans vne cassette, dont il auoit luy-mesme la clef: & en fin apres ie signois la troisieme pour la décharge du Tresorier de l'Espargne, les Roolles duquel s'arrestoient sur ledit Estat, signé du Roy, avec celuy que ie luy auois pareillement signé: Les Intendans & le Controolleur general qui y ont tous-jours assisté peuuent dire si iamais ils y ont trouué de la difference; est-ce le moyen pour destourner subtilement ces six cents mil escus? & qui

ne void que sans denonciateur, il ne faut que confronter le compte de l'Espargne avec l'Estat general, & avec ledict Estat que le Roy garde, pour en verifiser toute la despence, & me conuaincre, s'il y a difference d'un teston. A quoy donc ceste confidence avec le Tresorier de l'Espargne, qui sert de tous mets à mon denonciateur: Si c'est avec les comptables ordinaires, j'ay des-jà dit que leur fonds a esté retranché, & puis c'eust esté me commettre à tous leurs ordonnateurs particuliers, qui ont tous crié cōtre moy pour les retranchements que le Roy auoit fait en leurs charges: Il n'y a plus que les compositions, & changements d'assignation où j'ay peu amasser ces montagnes d'or: Mais comment auray-je composé, par exemple d'une ordonnance de cinq cents escus, à trois ou quatre cents, pourrois-je auoir esté assez fol (quant j'aurois esté si sordide & si lasche) que de le desirer pour me commettre encore à tant de gēs, où est le premier qui le dit, & puis ayant libellé sur les ordonnances du Roy en les visant: Le fonds pour les assigner s'ils n'estoient à payer comptant, & écrivant le mesme libellement sur lesdicts Estats, & sur les Roolles apres, ou peut-estre l'inuersion de fonds, ny pour le Tresorier de l'Espargne, ny pour le Sur-intendant, qui ne se voye comme le iour en plein midy. Mais à tant de calomnies ridicules, puis que le sens commun seulement y respond, & attendant qu'on me disse autre chose, ie concluëray hardiment, que bien qu'en tout ie m'aduouë tres-ignorant, personne (en ce seul mestier) ne se vantera de m'y auoir rien monstré depuis que j'ay esté Sur-intendant, ny de l'auoir renuié sur moy, soit en l'ordre, soit en la diligence, exactitude, precautions, ou fidelité pour la recepte ou despence. Au quatriesme ie ne sçay pas quelle est la consequence d'auoir veu le Comte Mansfeld, non plus que tout le reste de la Cour, j'appelle pourtant la memoire du Roy dans le profond respect que ie luy doibs, que ç'a esté avec son congé pris dans son Conseil, Monsieur le Duc d'Angoulesme l'auoir receu en sa maisō à Grosbois, & le voyoir souuent, lors

qu'il s'approcha de Compiègne : Je l'ay veu vne fois par
rencontre avec luy, à l'entrée de la Forest : ie n'ay parlé
qu'en sa presence : i'ay écouté des propositions qu'il me
fit, & n'ay rien traicté ny arresté avec luy, & ne l'ay pas re-
ueu depuis. Si ce m'est crime, ce Prince est donc aussi cri-
minel; Si mon bien-heureux denonciateur luy veut aller
dire, ie m'assure qu'il en reuiendra bien satisfait. I'en di-
rois plus sur ce subyet, mais on m'accuseroit, que pour
estendre ma iustification en chose si claire, i'aurois reuelé
malicieusement les secrets du Roy. Au cinquiesme ie n'ay
point ouy dire qu'à chacun e fois qu'un principal ministre
(comme i'ay eu l'honneur d'estre quelque temps) veoid
des Ambassadeurs; il deust prendre des lettres patentes, ou
des breuets de décharge; i'aduouë que ie ne me suis pas ad-
uisé de ceste precaution : Mais que i'aye traicté quelque
chose sans congé, ou contre les resolutions du Conseil, ie
le nie, & voudrois bien qu'on me dit en quoy; cecy est sans
replicque (en attendant) les mesmes Ambassadeurs m'en
peuvent conuaincre, ou les effects qui pourroient s'en
estre ensuiuis. Pour le premier, ces Messieurs sont tels de
naissance, & les estime tels de vertu, qu'absolument ie m'en
rapporte à leur témoignage. Pour l'autre, il en faut dire vn,
ou si l'on me veut condamner par conjecture, qu'on me
remarque au-moins quelque mauuais succès, bien qu'il
seroit bien rude de m'en rendre garand, que pour la part
que i'y aurois eu. Mais en cela ie ne puis assez louer Dieu
de son infinie bonté en mon endroict, de n'en auoir per-
mis le moindre es affaires du Roy, pendant que i'ay eu l'hō-
neur d'y servir; Je n'ay pas assisté à pas vn traicté (comme
Commissaire) qui ne soit reüssi heureusement; Il est vray
que i'en defere le bon-heur à la prudence de ceux avec les-
quels ie me suis trouué, mais au-moins ny ay-ie rien gasté.
Celuy d'Hollande, & les articles du mariage d'Angleterre
en font foy, & si ie n'ay pas eu l'honneur de signer à ces
derniers en ceste qualité, qui les confrontera avec ceux
qui ont esté conclus de mon temps, ny verra point de dif-

ference; Vous sçauiez (MONSEIGNEVR) si i'y ay seruy, & si i'en pourrois dire plus, s'il m'estoit permis. Voicy donc le mauuais estat où i'ay laissé toutes choses. Le Roy tenoit la paix en ses mains pour la garder chez luy parfaictement, & la donner à ses voisins & alliez: Si i'ay peu quelque chose auprès du Roy, on ne m'en peut oster ma part du merite: si rien, on ne me deburoit pas accuser de ce que l'on me suppose indistinctement de mal. C'est icy dis-je (MONSEIGNEVR) où est ma confusion, aussi bien que l'estonnement de tous les gens de bien; Que dans l'ordre & l'abondance pour les Finances, vne profonde paix dans le Royaume, la gloire du Roy si releuée par toute la Chrestienté, qu'il y a peu d'endroits où il ne fut aymé, ou craint, ou recherché, & en vn mot, toutes ses affaires à souhait: Je dis generallement pour ne rien specifier, ny rien excepter, vn repos domestique, au plus haut point qu'il se soit veu auparauant, ny depuis, ie me sois senty tout à coup, sans aucun subject, visible, non esloigné seulement (car cela peut arriuer dans le seul changement d'humeur à tous les Maistres) mais déchiré d'honneur, & traité aussi honteusement comme si toutes les affaires de Finances, & d'Etat, eussent esté sans-dessus-dessous, & que i'en eusse esté seul responsable: Que si ç'a esté pour des pechez secrets, ou s'il est possible après tout cecy que ie fusse ce môstre d'infidelité qu'on m'a fait, que n'a-on acheué de me chastier, pour donner quelque chose à la satisfaction publique; i'ay esté treize mois prisonnier, c'est assez de loisir, ie n'ay point demandé d'abolition (plustost dix mille morts:) il n'y auoit point là de coutumace, il estoit temps, & toutes choses y conuioiēt apres vn tel frasque: On n'a point veu non plus ma femme aux pieds du Roy, dans les dix premiers mois de ma prison, croyant tous-jours de iour à autre que mon innocence examinée dans vn Parlemēt m'en sortiroit avec hōneur, ce n'a plus esté que lors qu'ō m'a parlé de Iustice, ny d'amoindrir cependant les rigueurs de ma prison. Elle à grande raison de crier maintenant, & vous aduouë (Monseigneur)

que si i'estois elle, ie menerois tous nos enfans aux pieds du Roy, aux vostres, & à ceux du Parlement, affin de les faire condamner avec moy: La contumace le peut aussi aisément: C'est en ce spectacle pitoyable où i'eslance mes cris iusques au Ciel, ie me puis dire vn autre Iob du tēps! & pleust à Dieu qu'il me fut permis de demāder à mō Maistre (cōme il faisoit à Dieu) que tous mes crimes & mes seruices fussēt pesez en sa presēce, ceste bōté suprême luy a pardonné de se vouloir iustificier deuant son infinie sagesse, qui nous peut condamner dans nos seules pensées, & ceste diuine Majesté toute puissante s'est abaissée iusques à écouter vn peu de bouë viuante: Et nostre bon Roy n'excuseroit point les premiers mouuements de mon angoisse! Il pourroit refuser d'écouter vne femme outrée de douleur, criante (comme i'ay dit) mourante à ses pieds, cela n'est point imaginable, & quand il le seroit, il ne l'est pas que vous le souffrissiez, ny que vous en peussiez faire autant. Le Roy fait violence à son naturel Iuste & Bon; par les mesmes considérations avec lesquelles les Peres autrefois ont comme renoncé leurs enfans, pour les abandonner à la Iustice: L'interest de son Estat qu'on luy represēte, pour lequel il ne doit recognoistre personne, il est surpris. Mais en vous (MONSEIGNEVR) qu'vne longue experience, & vne exquisite probité ont esleué iusques à presider (s'il faut ainsi parler) toute la France en ces premieres & souueraines cōpagnies, où toutes les vertus (si elles estoient perduës) se pourroient retrouver, il seroit tout à fait inexcusable, vous deuiendriez vostre ennemy iuré aussi bien que le mien; Il l'a faut écouter, s'il vous plaist, & receuoir & lire ses plaintes, & vous declarer genereusement mon Protecteur dās la Iustice; les iugemens de Dieu vous seront presens, où les voix & les pleurs innocents de mes enfans vous appellent, & songerez vne fois par iour le reste de vostre vie, que mille mondes, & moins par consequent tous les hōneurs, non plus que ses rebuffes: Ces tourmens, voire la mort, ne

C

vous seruiroient point d'excuse deuant ce seuer Tribunal, ni par aucune consideration ny prudence mondaine vous differez plus long-temps à me secourir. Au sixiesme l'accusation est si vague, que s'il ne plaist à mon denoncateur de me spécifier quelque vne de ses resolutions que i'ay chargées, & qu'il a peut estre mieux obseruez que moy, ie n'en diray pas plus que cy-dessus. Le septiesme est à interpreter si il entend simplement que tous ceux generallyment qui n'ont pas esté contentez s'en doibuent prendre à moy, & aux mauvais offices que ie leur ay rendus, ou si par ce mot (doit) il veut inferer sourdinement vne particularité spécifique pour ceux qui ont l'honneur de toucher au Roy de proximité ou d'alliance, comme les Roynes, Monseigneur Frere vnique du Roy, & Messeigneurs les deux Princes du Sang, soit l'un ou l'autre: Il prend malicieusement le contre-pied de ce principalement ou ie me suis plus estudié de bien seruir, & ou ie pense auoir esté autant heureux: Car au premier i'appelle (avec le respect que ie leur doibs) tous les grands de l'Estat à la foy, desquels ie tiens à bonheur de me soubsmettre: Si iamais, ie dis iamais, i'ay pris le merite d'aucun contentement qu'ils ayent receu de mon temps, & si ie ne leur ay pas tous-jours témoigné (comme ie deuois) qu'ils ne me pouuoient sçauoir gré que de mon affection à les seruir (i'en repete les mesmes mots) n'ayant pas presque ouuert la bouche pour leurs affaires que le Roy ne m'eust preuenü, avec excès de bonne volonté pour eux: Et quant au contraire, ç'a esté chose que le Roy, ou n'a pas jugé faisable, ou ne l'a pas voulu: Si ie ne l'ay pas hardiment contestée à la décharge de mon Maistre, i'en pourrois rapporter cent particularitez remarquables dans les interets des premiers du Royaume, & c'est où i'aurois plustost à regretter d'y auoir esté si entier, que ie sçay y auoir perdu pour amys des personnes que i'auois tous-jours tres-cherement honoré, portant sur moy leur déplaisir en telle chose où ie m'estois réduit leur sollicitateur: Tout cecy est bien éloigné de leur auoir

fait des mauuais offices. Pour l'autre chef de cét article, le respect me deffend d'en parler sans congé : Que mon denonciateur combatte seulement ce qui s'en void par la conference des temps, & puis ie luy réponderay : Il en discourt à boulleueü, & suppose pour m'accuser ce qui ne se doit pas seulement penser, & ou quand i'aurois seruy, ie n'en voudrois autre témoignage que celuy qu'en ont rendu souuent leurs Majestez, ny autre recompence que le bon-heur de l'auoir fait. Le huitiesme & dernier se défait par la mesme responce, aussi ne l'a-il basti que pour (en me picquant de la plus fine perfidie d'un seruiteur) m'y faire tomber, comme dans vn piege, en me pensant deffendre: C'est pourquoy ie diray seulement, que quant il plaira au Roy de me le commander absolument, ie le feray souuenir de trente secrets sans hyperbole, & de consequence, qui ne se sçauent pas encore, & ne se sçauront iamais, & que s'il luy plaist de remarquer tous ceux dont il m'a honoré moy seul, s'il en à ouy parler du moindre depuis, ie veux mourir sans grace ny replique. I'en puis donner icy vn exemple conuictoire, puis qu'il est aujourd'huy public, par la rupture que les Commissaires ont fait de mon cabinet, deux pacquets cachetez s'y sont trouuez, vn tres-grâ & tout plain de clef, de chiffres importants, & l'autre beaucoup moindre, contenant vne piece d'escriture que ie ne puis nommer. Ils estoient encore cachetez des mesmes cachets de celuy, de la main duquel apres les auoir fait voir au Roy, il m'auoit commandé de les prendre: Il y à plus de trois ans : Si celuy de mes Commissaires, qui faict plus de bruiet & moins de Iustice en a vlé comme il à deü, de les porter au Roy sans les ouurir, il les aura tresbien recognus. Mais ie le voy d'icy, aussi curieux de les voir comme plusieurs liasses de lettres que ma femme m'auoit escrit sous sa pure fantaisie (ie veux dire raison d'estat). Mais au lieu (MONSEIGNEVR) de toutes mes responcez n'en auois ie pas vne bien plus forte en moins de mots : Me falloit il chercher d'autres témoignages de ma fidelité, apres celuy qu'il

pleust au Roy d'en rendre en plain Conseil, avec tant d'honneur & d'avantage pour moy à tous les corps Souverains de Paris, & iusqu'à M. le Preuost des Marchands, mandez exprés sur le bruiet de quelque refroidissement en mon endroit, & en suite au sortir de là à tous les Princes & grands du Royaume qui estoient à la Cour: Ou ne fut pas ma fidelité esleuée, qu'est-ce que le Roy n'en dit pas! & que peut souhaiter vn bon seruireur de loüanges & de bons sentimens d'un grand Roy, dont il ne m'honora lors, vous y estiez, & neantmoins huit iours apres au plus ie me veis conduire en prison. Bon Dieu (MONSEIGNEUR) qui pourra bien concilier vne si grande vicissitude, est-ce que mon denonciateur n'auoit pas encore bien decouvert ces crimes, que moy-mesme ie ne sçay pas. C'est trop, il me suffit que si dans la parfaicte cognoissance que le Roy auoit lors de mes soins, de mon affection, & de mes seruites, il me fit cet honneur de s'en dire satisfait, & au delà deuant de tels témoins, & si les calomnies depuis luy en ont peu diminuër la creance; I'espere que s'il vous plaist faire cet acte de charité pour vn malheureux, de luy représenter toutes ses responce, avec l'autorité de vostre iugement, lequel n'est pas de petit poids auprès de luy, que mes bõs denonciateurs ny trouueront point leur droit d'aduiz: Au moins ne puis-je pas doubter que si ie ne merite plus d'aller mourir quelque part pour son service, qu'il ne me laisse avec quelque honneur librement soupirer chez moy le malheur d'estre tombé dans sa disgrace, ie luy témoigneray par ma conduite le reste de mes iours que i'ay pû estre terrassé, mais non vaincu ny changé en la tresfidelleseruitude que ie luy doibs: Il se louuendra que i'ay tout pû dans ses bonnes graces, & que ie n'ay rien voulu pour moy, ny les miens, que le bon-heur & la gloire de l'auoir tresfidellement seruy: Il sçait ce que i'ay refusé, il aura pitié de me voir sortir de son service nud de biens, abbattu d'incommoditez, & presque accablez d'ennemis, Pennuy ne

me laissera plus long temps languir: Je luy demande les genoux en terre, & les larmes aux yeux, ce reste de miserable vie, pour mes enfans & non pour moy, c'est pour les eleuer en son amour, & en la seruitude qu'ils luy doiuent: Ce sont de ieunes plantes, lesquelles dans leur innocence attireront par leurs prieres la benediction de Dieu sur sa sacrée personne, comme par leurs seruices elles meriteront (peut-estre) quelque iour avec vsure l'auance & l'interest de ceste grace. Aydez-moy donc (MONSEIGNEVR) & me donnez la main pour me garantir du naufrage, comme personne qui m'avez aymé: ouurez les yeux pour me considerer plus sensiblement, & comme Chef de la Iustice fermez-les apres pour choquer tout sans aucune contraincte à ma deffence; Heureuse est la souffrance qui est pour la protection de l'affligé. Je finis, avec honte de la longueur de ma lettre, n'estoit vostre bonté à qui ie m'en remets, vous y comparerez, si vous plaist, à tant d'extremitez qui me talonnent, & iusques à me pardonner (comme ie vous en supplie tres-humblement) ce qu'un trop vif ressentiment (peut-estre) de mes maux m'auroit fait prononcer moins considerément; le principale est vostre Cœur, lequel ie vous proteste en moy tout entier pour le Roy, comme ie dois, & à prier Dieu,

MONSEIGNEVR, qu'il vous conserue heureusement à longues années; C'est

Vostre tres-humble, & tres-obeyssant seruiteur,
L A V I E V V I L L E.

